

Belia Dan Keusahawanan Tani : Kajian Faktor-Faktor Yang Mempengaruhi Penglibatan Belia Sebagai Usahawan Tani Di Pasir Puteh, Kelantan.

Youth And Entrepreneurship: Study Of Factors Affecting The Participation Of Youth Agro-Entrepreneur In Pasir Puteh, Kelantan.

Maisarah Che Ahmed
Sarmila Md Sum

Pusat Penyelidikan Kelestarian Sosial, Persekitaran & Pembangunan (SEEDS),
Fakulti Sains Sosial & Kemanusiaan,
Universiti Kebangsaan Malaysia 43600 Bangi Selangor.

Correspondence: Maisarah Che Ahmed (email: maisarah@siswa.ukm.edu.my)

ABSTRAK

Golongan belia adalah aset negara kerana mereka adalah pewaris yang akan meneruskan kesinambungan pembangunan dan merupakan sumber tenaga kerja yang penting bagi negara. Namun begitu perkembangan industri pertanian negara menunjukkan kurangnya penglibatan golongan belia di Malaysia dengan aktiviti pertanian komersial walaupun industri ini merupakan salah satu sumber pekerjaan utama bagi penduduk dunia. Justeru itu, kajian ini bertujuan untuk menenalpasti faktor-faktor yang mempengaruhi penglibatan belia sebagai usahawan tani di Malaysia. Kajian berbentuk kualitatif ini telah menjalankan temubual bersemuka dengan 7 belia di Pasir Puteh Kelantan yang memilih usahawan tadi sebagai kerjaya. Hasil analisis tematik terhadap data temubual menemui dua faktor utama yang mempengaruhi penglibatan belia dalam industri pertanian ini iaitu faktor individu dan faktor persekitaran. Faktor-faktor ini dibangunkan dari dapatan analisis tema peluang, sikap, latar belakang, ilmu pengetahuan, jaringan dan sokongan. Hasil kajian ini mendapati bagi meningkatkan penglibatan golongan belia sebagai usahawan tani, tumpuan perlu diberikan bagi menambahbaik faktor-faktor individu para belia disamping meningkatkan usaha menambahbaik faktor persekitaran yang menyokong industri pertanian sedia ada.

Kata kunci : belia, usahawan, kualitatif, penglibatan, pertanian

ABSTRACT

The youth is an asset of the country as they are the heirs who will continue the development of the country and an important source of the country's labor force . However, looking at the the development of the agricultural sector, it is showed that there are lacking involvement of youths in Malaysia with commercial agricultural activities eventhough this industry is one of the main sources of employment for the people of the world. Therefore, this study aimed to identify factors that influence youth participation as agriculture entrepreneurs in Malaysia. A

qualitative research was conducted through face to face interviews with 7 youth in Pasir Puteh, Kelantan who have chosen agriculture entrepreneurship as a career. The results of thematic analysis on the interview data discovered two key factors influencing youth involvement in the agricultural industry namely individual factors and environmental factors. These factors were developed from the findings of the analysis theme that are opportunity, attitude, background, knowledge, networking and advocacy. The results of this study found that, in the effort to increase the participation of youth as agricultural entrepreneurs, the focus should be given to improve the individual factors of the youth while increasing efforts to improve the environmental factors that support the existing agricultural industry.

Key words: youth, entrepreneur, qualitative, involve, agriculture

1. Pengenalan

Sektor pertanian merupakan salah satu sektor penting yang mendapat tumpuan dalam perdagangan dunia kerana ia merupakan pembekal makanan, sumber bahan mentah dan merupakan sumber pekerjaan kepada penduduk dunia. Kebolehan sesebuah negara memajukan sektor pertanian menunjukkan keupayaan negara tersebut membekalkan makanan yang mencukupi kepada rakyatnya. Negara maju seperti Amerika Syarikat, Australia dan Belanda tidak meminggirkan pembangunan sektor pertanian di negara mereka, malahan ia dimajukan sebagai satu entiti perniagaan yang berdaya saing dan menguntungkan (Kementerian Pertanian dan Industri Asas Tani 2012).

Senario dan perkembangan bidang pertanian komersial di Malaysia yang telah lama berkembang sejak 50 tahun lalu, jelas menunjukkan kurangnya penglibatan golongan belia dalam bidang ini. Kebanyakan golongan belia yang memiliki kelayakan pendidikan yang tinggi sanggup menunggu peluang pekerjaan dalam sektor lain seperti sektor awam dan swasta (Azizah Razak 2010) dari memilih untuk menceburkan diri dalam bidang ini..

Penglibatan generasi muda dalam industri pertanian sudah lama dibahaskan sejak tahun 1980 lagi. Pelbagai cara dilakukan oleh pihak kerajaan terutamanya untuk menarik minat golongan muda menyertai industri pertanian, namun hasilnya masih lagi tidak memuaskan. Hasrat kerajaan pada hari ini juga adalah untuk melahirkan ramai golongan belia yang menceburi sektor pertanian sepenuh masa dan menjadi usahawan tani yang berjaya. Namun begitu, industri pertanian negara pada hari ini masih dipelopori oleh golongan tua. Keadaan ini memungkinkan wujudnya cabaran-cabaran yang terpaksa dihadapi oleh sektor pertanian antaranya keperluan untuk menjamin bekalan makanan yang mencukupi, selamat, berkhasiat serta bermutu tinggi pada harga yang berpatutan dan keperluan untuk memperkukuhkan daya saing sektor pertanian negara bagi memastikan pembangunan pertanian yang mampan (Mohd Noor, *et al*, 2008)

Di negara Belanda dan Australia, usahawan tani telah menjadi satu bidang profesional dan menguntungkan (Kementerian Pertanian dan Industri Asas Tani, 2012).) Namun di Malaysia, anggapan belia bahawa pertanian adalah tradisional, tidak menguntungkan, dan tidak berpotensi untuk mengubah kualiti hidup harus dikikis selaras dengan tahap pemodenan negara dan pendidikan yang dimiliki belia. Statistik menunjukkan penglibatan belia dalam sektor pertanian adalah 771.0 ribu orang pada umur 15 hingga 40 tahun. Ini merupakan jumlah yang kecil berbanding sektor lain seperti pembuatan (1304.5 ribu) dan perdagangan (1,252.8 ribu) (Jabatan Perangkaan Malaysia, 2011). Menurut Azizah (2010) walaubagaimana pun, tidak dinafikan terdapat golongan belia yang telah berjaya dalam industri pertanian dan membuktikan bahawa pertanian itu merupakan satu perniagaan yang menguntungkan tetapi peratusan yang terlibat

dalam bidang ini berjumlah kecil. Justeru itu, kajian ini dijalankan bertujuan untuk memahami faktor yang mendorong keterlibatan belia dalam bidang keusahawanan tani dan mengenal pasti amalan pengurusan keusahawanan di kalangan belia yang dikaji.

2. Tinjauan Literatur

Ciri-ciri usahawan

Zafir.,et al (2003) mengatakan seorang individu yang berjaya dalam sesuatu bidang keusahawanan atau pun ingin membina diri sebagai seorang usahawan berjaya perlu mempunyai ciri-ciri tertentu. Kirby (1992) berpendapat bahawa terdapat ciri-ciri asas yang perlu dimiliki oleh setiap usahawan. Ciri-ciri berkenaan ialah mengenalpasti peranan, berkemampuan, bermotivasi dan kesediaan untuk berubah (dalam Aziz dan Zakaria, 2004). . Seseorang individu yang mempunyai sifat dan prilaku yang berorientasikan kejayaan (*achievement oriented*) juga digelar sebagai usahawan (Faridah dan Zuraidah, 2009). Ciri-ciri ini bukanlah sesuatu yang diwarisi semenjak seseorang itu dibangunkan tetapi ia dapat dipelajari dan dibangunkan. Antara ciri-ciri seorang usahawan dapat diterangkan melalui :

1. *Yakin*

Dalam mengejar kejayaan, seseorang usahawan perlu yakin pada diri sendiri dan mempunyai lokus kawalan dalaman yang tinggi. Mereka tidak percaya kejayaan dapat dicapai hanya melalui tuah ataupun takdir untung nasib, sebaliknya melalui usaha (Zafir.,et al, 2003). Menurut Faridah et al (2009), keyakinan diri yang tinggi di atas kebolehan mereka untuk mencapai kejayaan akan membuatkan mereka bersikap optimistik terhadap kejayaan yang bakal mereka kecapai. Beliau berpendapat bahawa dengan mempunyai keyakinan dan optimistik yang tinggi, tidak hairanlah banyak usahawan yang pernah gagal berkali-kali akhirnya menjadi seorang usahawan yang berjaya. Mereka tidak mudah kecewa, putus asa dan sedih apabila gagal dan mereka telah belajar dari kegagalan tersebut untuk mencari peluang yang ada. Aziz Yusof (2010) pula mengatakan keyakinan kepada diri sendiri merupakan personaliti yang perlu ada dalam diri seorang usahawan. Yakin dengan kapasiti dan potensi diri sendiri dalam melakukan kegiatan keusahawanan kerana memiliki kekuatan-kekuatan berikut:

- a) Pengalaman langsung dalam aktiviti perniagaan yang ingin diceburi sebagai pedoman untuk bertindak.
- b) Pemerhatian ke atas pengalaman orang lain dan mengambil ikhtibar daripadanya.
- c) Kesediaan membangunkan kemahiran, kebolehan dan pengetahuan dengan penuh keyakinan serta menganggap kesilapan sebagai satu proses pembelajaran.

2. *Berorientasikan peluang*

Kejayaan sesuatu perniagaan bukan bergantung pada strategi, struktur dan sumber yang tertentu tetapi juga bergantung pada peluang yang diperolehi. Seorang individu yang bijak mengenal pasti peluang yang wujud di persekitaran mampu menjadi usahawan berjaya (Zafir.,et al, 2003). Menurut Kementerian Pelajaran Malaysia (2010), usahawan yang berjaya akan sentiasa memikirkan untuk mencapai matlamat yang ditetapkan. Bagi mereka, untuk mencapai matlamat memerlukan kepekaan dan pandai mengambil peluang yang terdapat di sekitarnya. Peluang

boleh diwujudkan melalui masalah yang ditimbulkan oleh orang lain, perubahan teknologi, perubahan cita rasa pengguna, perubahan cara hidup, perubahan sikap dan sumber-sumber alam yang masih belum diterokai.

3. Mengambil risiko

Menurut Faridah et.al (2009), usahawan yang baik juga merupakan seorang yang berani menanggung risiko. Beliau berpendapat bahawa usahawan bukanlah seorang yang sanggup mengambil risiko secara membabi buta, segala risiko yang bakal dihadapi telah diambil kira kesannya pada untuk jangka masa tertentu. Zafir.,et al (2003) pula berpendapat bahawa seorang usahawan akan mengambil risiko yang sederhana apabila berhadapan dengan ketidakpastian, usahawan menimbang semua aspek yang mungkin dan berhati-hati membuat sebarang pilihan. Beliau mengatakan usahawan tidak sukar mengucapkan perkataan ‘tidak’ sekiranya beliau berasa tidak berupaya mencapai sesuatu matlamat yang terlalu tinggi. Mereka juga cuba mengelakkan diri mereka daripada terjebak dengan risiko yang tidak munasabah. Aziz Yusof (2010) pula menambah dengan mengatakan bahawa usahawan yang bersedia mengambil risiko yang tinggi akan lebih kerap membuat keputusan dengan menggunakan maklumat yang sedikit dan masa dalam membuat keputusan juga singkat.

4. Bertanggungjawab

Seorang usahawan bertanggungjawab ke atas sebarang keputusan berkaitan dengan perniagaan yang diceburi. Beliau lebih suka mengawal sendiri sumber-sumber berkaitan perniagaan untuk mencapai matlamat yang telah ditetapkan terlebih dahulu. Kesanggupan mengambil tanggungjawab terhadap hasil keputusan yang dibuat berkait rapat dengan lokus kawalan dalaman (Kementerian Pelajaran Malaysia, 2010). Golongan ini meletakkan diri mereka sebagai orang yang bertanggungjawab dalam sesuatu operasi tidak kira sama ada berjaya atau gagal. Usahawan adalah seorang yang bertanggungjawab terhadap apa yang bakal berlaku dan mengambil inisiatif untuk menyelesaikan masalah (Faridah et al, 2009).

5. Berdaya kreativiti dan inovatif

Kreatif dan inovatif adalah perkara utama yang perlu ada pada setiap usahawan untuk memperolehi kelebihan. Melalui fikiran yang kreatif, inovatif dan daya imaginasi, usahawan dapat menghasilkan produk yang khusus dan memberikan perkhidmatan kepada para pengguna. Memiliki sifat kreatif dan inovatif, usahawan mempunyai kelebihan bersaing (Faridah et al, 2009). Usahawan yang memiliki minda yang kreatif juga dapat mencipta sesuatu yang baharu dan menyelesaikan masalah dengan logikal. Kreativiti dijelaskan sebagai kebolehan terhadap idea dan memperkembangkan idea baru tersebut serta boleh memberikan pandangan lain terhadap sesuatu peluang, situasi dan masalah. Inovatif pula adalah kebolehan memperbaiki dan mengaplikasikan idea kreatif terhadap masalah dan peluang untuk memperkukuhkan dan memperkayakan sesuatu perkara (Kementerian Pelajaran Malaysia, 2010).

Faktor-Faktor Mempengaruhi Penglibatan Belia Dalam Keusahawanan Tani

1. Sosio-demografi

Menurut Aziz *et al.*, (2013), sosio-demografi menjadi faktor utama yang akan membentuk penerimaan dan sikap golongan muda terhadap keusahawanan pertanian yang meliputi gender, umur, pendapatan, taraf pendidikan, lokaliti dan etnisiti. Umur yang dimaksudkan merujuk kepada umur yang sesuai oleh seseorang individu untuk menjalankan aktiviti pertanian (Silva *et al.*, 2010). Uli *et al.*, (2010) . Kajian yang lengkap oleh Salleh dan Azril (2009) dan Ezhar *et al.* (2007) menunjukkan bahawa purata umur petani di Malaysia melebihi 46 tahun. Semua penemuan ini membawa kita kepada satu pemahaman bahawa Malaysia memerlukan masyarakat pertanian sandaran yang terdiri daripada belia (Aziz *et al.*, 2013).

Pendapatan juga menjadi pendorong penglibatan belia dalam bidang usahawan tani. Salah satu elemen penting dalam memilih pekerjaan ialah ganjaran, iaitu upah atau gaji (Silva *et al.*, 2010). Prowse dan Chimhowu (2007), mengatakan bahawa golongan miskin lebih suka memilih bidang pertanian sebagai salah satu pekerjaan tetap mereka. Mereka berpendapat bahawa pertumbuhan pertanian didorong oleh harga pengeluar yang lebih tinggi dan peningkatan produktiviti yang akan menyebabkan penghasilan pendapatan yang baik.

2. Penerimaan

Penerimaan merupakan salah satu faktor galakan bagi golongan muda untuk terlibat sebagai usahawan tani. Hal ini akan menyebabkan golongan muda lebih bersedia dari segi emosi dan berfikir secara positif terhadap potensi bidang pertanian (Aziz *et al.*, 2013). Menurut Uli, *et al* (2010), dari kajian yang mengendalikan sikap, kepercayaan, sokongan dan tahap pengetahuan golongan muda terhadap bidang pertanian menunjukkan peningkatan penerimaan golongan muda terhadap konsep pertanian dapat dilaksanakan melalui penganjuran bengkel, seminar, dan lain-lain kaedah yang berkesan untuk menyebarkan maklumat mengenai keupayaan pertanian kontrak sebagai satu alternatif yang mampu menjana pendapatan. Beliau juga berpendapat bahawa pendekatan ini merupakan salah satu cara bagi menarik minat golongan muda menghasilkan aktiviti perladangan yang inovatif yang menjadi tarikan aktiviti pertanian dan mampu memupuk industri pertanian yang lestari.

3. Sikap terhadap industri pertanian

Sikap merupakan salah satu faktor dalam penglibatan belia terhadap pertanian. Sikap juga berkait rapat dengan penerimaan belia terhadap bidang pertanian ini. Secara umumnya, sikap yang positif akan membawa kepada penerimaan yang baik dan sikap negatif akan membawa kepada penerimaan negatif (Jeffrey *et al.*, 2013). Gidakou (1999) telah menjalankan kajian dan mendapati bahawa belia yang mempunyai sikap negatif terhadap bidang pertanian menyebabkan mereka sukar untuk menerima pertanian sebagai kerjaya (dalam Jeffrey *et al.*, 2013). Justeru itu kajian Kumar (2007) mendapati apabila terdapat beberapa sistem di India yang mampu menjamin pasaran keluaran petani dengan harga yang menguntungkan, maka para petani telah mempunyai sikap positif terhadap aktiviti pertanian melalui perlindungan harga terhadap hasil tanaman mereka tersebut

4. Pengetahuan

Menurut Uli et al., 2013, pengetahuan merupakan elemen paling utama dalam membolehkan seseorang individu menerima pertanian sebagai kerjaya dan seterusnya akan meningkatkan penerimaan terhadap bidang ini. Beliau berpendapat bahawa pengetahuan pertanian akan membuka peluang terhadap penggunaan teknologi baru yang akan membantu golongan petani untuk meningkatkan produktiviti. Kurosh dan Saeid Salehi (2010) melalui kajiannya menambah dengan mengatakan ketepatan teknologi dalam pertanian adalah pendekatan yang digunakan untuk pengurusan ladang dan bermatlamat untuk meningkatkan keuntungan dan kemampunan, kualiti produk yang lebih baik, mengesan serangga perosak, tenaga, air dan pemuliharaan tanah. Justeru itu, Noor et al. (2008) mencadangkan penawaran kursus, seminar dan bengkel mengenai keusahawanan haruslah dipertingkatkan dari masa ke semasa kepada peladang dan kakitangan MADA bagi menambah lagi pengetahuan dan mengembangkan penghargaan diri dan kawalan personal terhadap bidang keusahawanan pertanian

5. Sokongan

Sokongan merupakan elemen yang signifikan dengan penglibatan belia dalam bidang keusahawanan tani. Hal yang demikian telah dibuktikan melalui kajian Aziz et al (2013), dan Jeffrey et al. (2013). Jeffrey et al., 2013 mengatakan bahawa sokongan yang diterima daripada pihak kerajaan, agensi bukan kerajaan, media dan para kontraktor adalah penting bagi petani untuk membantu tanaman mereka. Menurut Jeffrey et al., lagi, petani yang terlibat dengan pertanian sama ada secara individu ataupun kontrak mengatakan bahawa mereka menerima sokongan dari segi kawalan harga, pengurusan ladang oleh para pegawai pertanian dan mengenai maklumat penggunaan teknologi terkini.

Aziz et al., (2013) telah membuktikan melalui kajiannya bahawa penglibatan dalam bidang pertanian bukan sahaja melibatkan penerimaan, sikap, dan pengetahuan tetapi turut dikaitkan dengan sokongan keluarga, sokongan kerajaan dan promosi daripada pihak dan agensi yang berkaitan. Beliau menambah terhadap kajian yang dilakukan oleh Uli et al (2013) dengan mengemukakan bahawa terdapat faktor lain seperti sokongan keluarga dan kerajaan yang dijalankan melalui promosi dan festival pertanian sebenarnya dapat meningkatkan penyertaan belia dalam sektor pertanian. Beliau juga berpandangan bahawa belia perlu lebih peka terhadap peluang untuk kebaikan diri dan keluarga, dan mereka tidak sepatutnya terlalu memilih pekerjaan.

6. Kepercayaan

Salah satu lagi faktor penting yang menjadi penentu penglibatan golongan belia terhadap pertanian adalah peranan kepercayaan. Jeffrey et al (2013), mengakui bahawa jika remaja boleh meletakkan tahap kepercayaan yang tinggi terhadap bidang pertanian sebagai instrumen yang akan menghasilkan faedah bagi mereka, ia akan menjadi rangsangan besar bagi mereka untuk melibatkan diri dalam aktiviti pertanian.

7. Jaringan

Noor et al., (2008) mengatakan bahawa golongan petani digalakkan untuk meluaskan pergaulan dan komunikasi mereka dengan golongan petani yang lain kerana dengan cara demikian dapat mempertingkatkan pengetahuan mengenai bidang perniagaan dan seterusnya dapat memberi motivasi dan galakan ke arah menjadi usahawan dalam bidang pertanian. jaringan wujud apabila adanya interaksi atau hubungan kedua seorang individu. Interaksi atau hubungan ini kebiasaannya wujud dengan orang sekeliling atau pihak tertentu.


3. Metodologi Kajian


Kajian ini menggunakan kaedah penyelidikan kualitatif bagi menjawab persoalan kajian. Data Kajian ini perolehi dengan menggunakan teknik temu bual semi berstruktur. Kajian ini dijalankan di di Jajahan Pasir Puteh, Kelantan. Seramai 7 informan telah dikenalpasti dari Kampung Bukit Awang dan Kampung Haji Wan Omar yang merupakan usahawan tani yang berusia diantara 18 tahun sehingga 40 tahun .Sebelum mengadakan temubual, pengkaji telah membuat perancangan awal bagi menguruskan sesi temu bual dengan informan kajian.. Pengkaji telah menggunakan “*key informer*” untuk mendapatkan maklumat lebih lanjut mengenai responden. Dalam kajian ini, pengkaji menggunakan teknik analisis tematik bagi menganalisa data kajian. Melalui teknik ini data kajian akan melalui proses koding sebelum di kumpulkan mengikut kluster dan diberikan kategori.

4. Dapatan dan Perbincangan

4.1 Faktor-faktor mempengaruhi penglibatan belia sebagai usahawan tani:

Hasil temubual yang telah dilakukan berjaya menemui faktor-faktor penglibatan belia sebagai usahawan tani. Pengkaji telah mengelaskan 2 faktor utama yang mempengaruhi penglibatan belia iaitu faktor individu dan faktor persekitaran (rujuk rajah 1).





RAJAH 1. Faktor-faktor yang mempengaruhi penglibatan belia sebagai usahawan tani.

Faktor Individu

Faktor individu melibatkan diri individu itu sendiri yang menjadi pendorong kepada penglibatan dalam sektor pertanian. Antara faktor individu yang telah berjaya dikenalpasti bagi kajian ini seperti peluang, sikap, demografi dan pengetahuan.

1. Peluang

Tema utama bagi faktor penglibatan belia telah dikenalpasti melalui peluang yang disediakan oleh sektor pertanian. Peluang telah dikenalpasti melalui peluang pekerjaan dan penajaan sumber pendapatan dan keuntungan. Bidang pertanian berjaya dibuktikan mampu membuka peluang menjana pendapatan kepada individu yang terlibat. Hasil daripada proses temubual yang telah dilakukan terhadap 6 orang responden menyatakan bahawa penyertaan mereka sebagai usahawan tani telah memberikan pendapatan dan keuntungan kepada mereka. Hasil penelitian juga mendapati faktor penglibatan belia sebagai usahawan tani antara salah satu sebab utama adalah mampu menjana pendapatan. Mereka berjaya memperoleh pendapatan semusim sekitar RM 10 ribu dengan keluasan paling minima yang dikerjakan adalah 1 ekar dengan tempoh memperolehi hasil paling maksimum memakan masa 3 bulan. Hal ini dapat dilihat melalui reaksi responden yang ditemui iaitu R2, R5, dan R6.

Menurut responden ke lima (R5) berpendapat bahawa pertanian tetap memberikan pendapatan kepada mereka walaupun memperolehi hasil yang sedikit dan mampu menjamin masa hadapan. Hal ini turut disokong oleh responden ke enam (R6) yang mengatakan pendapatan yang diperolehinya agak lumayan sepanjang bergelar usahawan tani.

R5 mengatakan bahawa:

“Kalau ikut tetap tu (pendapatan), tidak jugaklah. Kadang-kadang tengok musim juga. Kalau dalam pertanian ni kalau musim hujan, musim boh (banjir) takleh nak tanam juga. Tapi keuntungan tu untuk setahun tu bolehlaa (dapatlah)...”

Keuntungan dalam tema ini juga bukan sahaja menerangkan mengenai kewangan tetapi mengenai faedah atau kebaikan yang diperolehi oleh individu dan pekerjaan yang dijalankan. Ini telah dikemukakan oleh responden 1 (R1) yang mengatakan bahawa:

“jika dinilai keuntungan banyak keuntungan yang saya dapat tidak nyata seperti pemberian bantuan daripada kerajaan iaitu untuk mengalakkan golongan muda untuk menjalankan usaha pertanian, meneruskan tradisi dan satu lagi dari segi keuntungan yang diperolehi dari hasil pertanian...”

Bidang ini juga menyediakan peluang pekerjaan kepada belia yang terlibat. Persaingan yang tinggi dalam bidang pekerjaan lain telah menyebabkan golongan belia sukar memperoleh pekerjaan dan memilih untuk menyertai pertanian. Hal yang demikian kerana sektor pertanian dianggap sektor yang paling mudah dan sentiasa memerlukan tenaga kerja terutamanya tenaga kerja muda. Bekerja dalam sektor pertanian ini memerlukan ketekunan, kesungguhan dan kesabaran. Pekerjaannya tidak seperti pekerjaan lain yang menyediakan tempat berteduh yang selesa dan gaji tetap setiap bulan.

Hasil kajian di lapangan mendapati, 2 daripada 7 orang responden telah ditemubual menyatakan bahawa sektor pertanian telah membuka peluang pekerjaan kepada mereka. Kehidupan di kampung tidak mempunyai peluang pekerjaan yang banyak. Sebelum menyertai bidang pertanian, mereka pernah melakukan pekerjaan lain. Namun setelah mereka memilih untuk bergelar petani mereka mendapati pekerjaan ini membuka peluang kepada mereka untuk memajukan diri dan sesuai dengan jiwa mereka yang selesa tinggal di kampung. Penglibatan mereka juga tidak dipengaruhi oleh mana-mana pihak dalam menentukan kerjaya sebagai usahawan tani. Ini dapat dilihat melalui temubual bersama R2 dan R5.

R2 mengatakan bahawa:

“ yang mula-mula (utama) kita duduk kampung ni kerjaan lain takdok. Hok tulah (pertanian) hok jadi utama...”

“ dulu, ambil diploma. Pelajaran tu tinggi jugak la diploma. Tapi pekerjaan sekarang tak boleh nak milik untung tu lebih kurang. Boleh (pendapatan) tu (merujuk kepada pertanian) lebih kurang jah dengan orang kerja tinggi...”

2. Sikap

Sikap merupakan tema kedua dalam kajian ini. Sikap turut menjadi faktor penglibatan belia sebagai usahawan tani. Berdasarkan temubual yang dilakukan pengkaji mendapati sikap boleh dikaitkan dengan minat, keinginan yang tinggi untuk bekerja sendiri, dan dapat mengatasi rasa malu dalam diri.

2.1 Minat

Hasil daripada proses temubual yang telah dilakukan, 4 orang responden telah mengatakan penglibatan mereka sebagai usahawan tani adalah disebabkan minat terhadap pertanian. ketiga-tiga responden iaitu R1, R2, R6 dan R7 mengatakan mereka mempunyai minat dalam bidang pertanian menyebabkan mereka telah mengusahakan aktiviti pertanian. minat yang timbul bukan sahaja dari kecil lagi atau disebabkan persekitaran asal usul keluarga namun minat juga wujud setelah dipupuk. Malah seorang daripada mereka iaitu R6 mengatakan disebabkan minat bertani, responden telah menjadikan bertani hobi masa lapang. Hal ini menjadi faktor penglibatan mereka sebagai usahawan tani.

Bagi R2 pula minatnya wujud sejak kecil:

“...kita asal kampung jadi minat kepada pertanian sejak kecil lagi, duduk nane(tanam) tiap-tiap hari, turun tangga tu tengok tanaman...”

R7 pula minatnya wujud setelah dipupuk:

“ Sebelum ni ada jugalah tolong-tolong saing-saing tu po nebah (bersih) kebun, hutan tu. Ada gu (saing) tu tanam serai kat Gua Musang. Rajin gi tolong dia, pastu duduk bual-bual dengan dia pasal keuntunga, cara-cara tanam ni. Dari situ start minatlah...”

Namun terdapat usahawan tani iaitu R6 terlibat disebabkan hobi pada masa lapang.

“ nombor 1 sekalinya hobilah, daripada kecil lagi saya minat tengok orang tanam. Boleh dikatakan hobi sengoti-ngotilah (betul-betul) untuk jadi petani ni. Ibu bapa saya pun kerja tanam, daripada situlah minat tanam hinggalah ke hari ini...”

2.2. Keinginan

5 orang responden yang ditemui melalui temubual yang dijalankan iaitu R1, R2, R4, R5, dan R7 mengatakan penglibatan mereka sebagai usahawan tani adalah disebabkan keinginan yang telah dikenalpasti sebagai salah satu faktor penglibatan. Keinginan ini telah membuka ruang kepada sikap ingin mencuba, keinginan bekerja sendiri dan mengatasi rasa malu sehingga telah memperoleh kejayaan dalam bidang yang diceburi..

Menurut R1 keinginan bekerja sendiri menyebabkan responden terlibat sebagai usahawan tani:

“...saya boleh bekerja sendiri, saya boleh jadi ketua pengarah dan saya juga mengarah maksudnya saya juga ada beberapa pekerja...”

R2 pula mengatakan keinginan yang tinggi untuk menyertai bidang pertanian telah mengatasi rasa malu disebabkan penduduk kampung turut menyertai bidang pertanian:

“...saya tak malu langsung. Mugo (sebab) duduk kampung sebelum nie, jadi kalau duduk menanam tu orang kampung nie semua menanam. Orang lain banyak duduk menanam di kampung ni, tanam labu, timun, timun batang pun ada, terung. Semua bagi pendapatan, untung tu banyaklah bolehlah tampung anak-anak keluarga, jadi gak saya ni tak malulah menanam ni...”

3. Latar Belakang

Latar belakang turut menjadi elemen penting dalam mempengaruhi faktor penglibatan belia sebagai usahawan tani seseorang individu. Latar belakang dalam kajian ini merujuk kepada pengalaman yang diperolehi dan latar belakang ibu bapa yang terlibat dalam bidang pertanian. pengalaman merujuk kepada pengalaman lalu yang mana belia telah terlibat dalam bidang pertanian sama ada secara sementara dengan mengambil upah atau membantu keluarga. Latar belakang ibu bapa pula merujuk kepada ibu bapa mereka yang bekerja sebagai petani, terlibat secara aktif dalam bidang pertanian dan menjadikan pertanian sebagai sumber pendapatan utama mereka.

Berdasarkan hasil temubual, pengkaji mendapati 4 orang responden mengaitkan penglibatan mereka sebagai usahawan tani disebabkan oleh faktor pengalaman. R1, R3, R4 dan R5 mengatakan pengalaman sama ada terlibat secara tidak langsung dalam bidang pertanian berperanan penting dalam penglibatan usahawan tani yang dilakukan secara langsung.

Bagi R1:

“ kalau saya, pengalaman bertani ni dari kecil lagi orang kata dari buaian lagilah sebab keluarga saya pun petani mengusahakan pertanian dan saya pun meneruskan...”

Hasil temubual yang dijalankan juga, pengkaji mendapati penglibatan belia sebagai usahawan tani disebabkan oleh pengaruh ibu bapa mereka. Kebanyakan daripada mereka mengatakan mereka dibesarkan daripada keluarga petani dan berada dalam persekitaran pertanian. mereka memperoleh bakat bercucuk tanam daripada keluarga. Pengkaji mendapati 4 orang responden iaitu R1, R2, R4, dan R7 mengatakan pengaruh ibu bapa menjadi faktor mereka terlibat. Hal ini menunjukkan mereka mewarisi bidang pertanian yang dijalankan dan berusaha untuk memajukan ladang yang diusahakan.

Bagi R1:

“...sebab keluarga saya pun petani mengusahakan pertanian dan saya pun meneruskan...”
“orang kata basic (asas) untuk bertani sebab saya anak seorang petani...”

4. Pemilikan Aset

Pemilikan aset turut menjadi faktor pendorong penglibatan belia sebagai usahawan tani dalam kajian ini. Pemilikan aset yang dimaksudkan oleh pengkaji adalah pemilikan tanah. Pengkaji mendapati bahawa faktor pemilikan tanah turut menyumbang kerana dengan memiliki tanah secara persendirian mahupun secara sewa menyebabkan belia mengambil keputusan untuk terlibat sebagai usahawan tani. Hasil temubual yang dijalankan dalam kajian ini, pengkaji mendapati terdapat 2 orang responden menyertai pertanian ini disebabkan memiliki tanah untuk bertani. Antara responden yang dimaksudkan adalah R2 dan R7. Responden mengatakan bahawa pemilikan tanah yang sesuai untuk tanaman telah diwarisi daripada ibu bapa telah menyebabkan mereka terlibat dengan pertanian. Hal ini kerana jika dibiarkan tanah tanpa sebarang aktiviti bercucuk tanam, ia merupakan satu kerugian.

Menurut R2:

“kalu kiro mugo duk kampung nie, kiro tanah asal mok ayah kita dulu lagi, sekarang duk menanam tanah sendirilah.”

5. Pengetahuan

Tema ke 5 yang dikaitkan dengan faktor penglibatan belia sebagai usahawan tani adalah pengetahuan. Dalam kajian ini, pengkaji telah bahagikan pengetahuan kepada 2 iaitu dilihat dari segi kemahiran yang dimiliki dan penyertaan dalam kursus berkaitan pertanian. Melalui pengetahuan dapat membuka ruang kepada responden untuk memajukan diri dalam bidang pertanian terutamanya dari segi penggunaan teknologi dan teknik-teknik yang boleh digunakan dalam pertanian.

Merujuk kepada proses temubual yang dijalankan seramai 5 orang responden telah memiliki kemahiran bertani sebelum bergelar usahawan tani. Kemahiran ini diperoleh melalui pembacaan, perkongsian, dan pengalaman. Malah bagi mereka usaha kerajaan memperkenalkan teknik-teknik baru turut diberi perhatian. Ini dapat dilihat dalam kaedah penanaman fertigasi dan

pendedahan penggunaan kaedah pertanian moden. Dari segi penggunaan baja, racun, dan jentera turut dikaitkan dengan kemahiran. Hal yang demikian kerana tanpa kemahiran yang baik, ia tidak dapat menghasilkan tanaman yang segar.

Menurut R1:

“...dari segi aplikasi saya adaptasi apa yang terbaik dan dengan bantuan teknologi semasa seperti penggunaan teknologi saya boleh amalkan. Seperti pertanian hidroponik yang sebelum ni tak ada digunakan, saya cuba gunakan.”

6. Kursus

Penglibatan dalam kursus atau seminar juga turut dikaitkan dengan pengetahuan yang dimiliki dan menjadi pendorong penglibatan belia sebagai usahawan tani. Kursus yang dihadiri antaranya melalui Peladang, MARDI atau Pejabat Pertanian yang menjadi penggerak kepada pembangunan pertanian di kawasan kajian. Hasil temubual mendapati 6 orang responden pernah menghadiri kursus yang dijalankan oleh agensi terlibat, manakala seorang responden mengatakan tidak pernah menghadiri mana-mana kursus iaitu R6.

Menurut R1:

“saya juga terlibat dengan kursus, saya pernah pergi kursus MARDI ada mengadakan kursus, saya menyertainya untuk mendapatkan maklumat atau informasi berkaitan dengan pertanian. Jadi pertanian tu perlukan ilmu jugalah...”

4.2 Faktor Persekitaran

Penglibatan belia sebagai usahawan tani juga dikaitkan dengan faktor persekitaran. Pengkaji telah mendapati bahawa penglibatan belia turut dipengaruhi oleh jaringan sokongan. Dalam kajian ini, pengkaji telah membahagikan jaringan kepada 2 iaitu hubungan di antara petani dan hubungan di antara agensi yang terlibat. Manakala dari segi sokongan pula dilihat melalui sokongan ahli keluarga, kerajaan, dan masyarakat sekeliling. Hal yang demikian kerana faktor persekitaran ini turut menentukan kejayaan belia sebagai usahawan tani.

1. Jaringan

Jaringan turut dikenalpasti menjadi tema utama dalam kajian ini. Jaringan merujuk kepada hubungan pergaulan dan komunikasi para petani yang bertujuan untuk meningkatkan hubungan tolong-menolong dan pengetahuan dalam bidang pertanian. melalui jaringan juga dapat membangunkan semangat dan galakan untuk berusaha dalam pekerjaan yang dilakukan. Dalam kajian ini, pengkaji telah mendapati terdapat dua jaringan yang wujud iaitu jaringan sesama komuniti petani dan jaringan dengan agensi yang terlibat.

Hasil kajian mendapati kesemua responden mempunyai jaringan sesama petani. Jaringan ini yang membina keakraban dan membina semangat tolong-menolong sesama mereka. mereka tidak lokek untuk berkongsi pengalaman, berkongsi idea dan membantu di antara mereka yang menghadapi masalah dalam tanaman yang dikerjakan. Hal ini dapat dilihat melalui temubual yang dilakukan bersama responden iaitu R1 dan R6:

R1 mengatakan:

“Kita sebagai petani antara petani kitorang akan saling tolong-menolonglah dari segi penggunaan racun ke, apa ke dan sebagainya.”

Jaringan yang kuat diantara agensi terlibat turut menjadi faktor kejayaan usahawan tani dalam bidang pertanian. jaringan ini wujud diantara agensi seperti Peladang, FAMA, Mardi dan Jabatan Pertanian. agensi terlibat bersedia memberi khidmat sokongan dari seri segi nasihat, bantuan input, kewangan, modal, dan pemasaran. Hasil temubual mendapati 6 orang responden mempunyai jaringan yang baik dengan agensi terlibat. Pihak seperti Peladang sentiasa memberi galakan dan berhubung dengan mereka melalui pemantauan yang dijalankan. Malah, Jabatan pertanian sering turun padang bagi melihat keadaan tanaman dan memberi bantuan bila diperlukan.

Bagi R1:

“Sekiranya saya ada permasalahan ataupun lain-lain yang berkaitan pertanian saya boleh rujuk kepada mereka (Jabatan Pertanian) dan satu lagi pemasaran saya ada FAMA sebagai pembantu untuk pasarkan hasil saya...”

2. Sokongan

Sokongan merupakan elemen yang penting terhadap penglibatan belia dalam bidang keusahawanan tani. Sokongan juga dalam kajian ini dikenalpasti sebagai tema asas faktor yang mempengaruhi penglibatan belia sebagai usahawan tani. Sokongan dibahagikan kepada 3 iaitu sokongan daripada ahli keluarga, agensi dan masyarakat. Bagi mereka yang terlibat, sokongan memainkan peranan penting dalam menentukan kejayaan tanaman yang diusahakan.

Keluarga merupakan memberi sokongan yang paling utama dalam kajian ini. Hal yang demikian melalui sokongan keluarga seseorang individu akan menjadi bertambah yakin dan bersemangat dalam melakukan sesuatu pekerjaan. Hasil temubual yang dijalankan terhadap responden, pengkaji mendapati 3 orang responden telah mengatakan keluarga berperanan penting dalam pekerjaan yang diusahakan.

Bagi R2:

“hok sengotinya (sebenarnya) yang bagi sokongan, keluarga kitalah terutamanya bini kita. Keluarga juga bagi sokongan dan bantuan bila kita susah terutamanya bila perlukan modal menanam”.

Sokongan agensi turut menjadi tema asas kepada faktor-faktor yang mempengaruhi penglibatan sebagai usahawan tani. Agensi yang terlibat antaranya seperti Peladang, FAMA, MARDI, Jabatan Pertanian dan Yayasan Sejahtera. Sokongan agensi ini dapat dilihat melalui hubungan antara petani dan agensi yang baik melalui galakan iaitu pemberian bantuan, khidmat nasihat dan melakukan pemantauan yang berterusan. Hasil kajian ini mendapati 6 orang responden memperoleh sokongan yang baik dari agensi iaitu R1, R2, R3, R4, R5 dan R7 .

Menurut R1:

“Dari segi pertanian, saya mengusahakan tanaman tembikai. Dari segi Peladang ada beri sumbangan dia sokong (support) saya sebagai ahli, pemberian subsidi daripada kerajaan.

Aspek tulah pemotongan dari segi pembelian barang di cawangan peladang (PPK) kawasan. Jabatan pertanian ada support. Diorang ada turun padang dan ada memberi inisiatif-inisiatif seperti pemberian baja dan kaedah aplikasi untuk pertanian. Sekiranya saya ada permasalahan ataupun lain-lain yang berkaitan pertanian saya boleh rujuk kepada mereka dan satu lagi permasalahan saya ada fama sebagai pembantu untuk pasarkan hasil saya. Jadi, tidak adalah. Bantuan tu dari agensi-agensi kerajaan tu amat menggalakkanlah setakat ini.

Sokongan masyarakat juga turut menjadi tema asas dalam kajian ini. Sokongan yang diperolehi merujuk kepada motivasi, bantuan kewangan, dan perkongsian idea untuk menjayakan tanaman. Hasil kajian mendapati secara keseluruhan memperoleh sokongan daripada masyarakat.

Menurut R1:

“ dari segi galakan tidak dapat dinafikan, seperti saya seorang bekas graduan jadi orang masyarakat tempatan terujalah bila saya mengusahakan tanaman, saya tidak meneruskan bekerja dalam bidang saya...”

4.2 Perbincangan

Hasil kajian ini telah menunjukkan bahawa penglibatan belia sebagai usahawan tani telah dipengaruhi oleh beberapa faktor yang dirujuk sebagai faktor individu dan faktor persekitaran. Pendekatan yang melibatkan pihak-pihak tertentu seperti pihak Peladang Kawasan, Jabatan Pertanian, MARDI dan Yayasan Sejahtera turut menjadi penyumbang penglibatan belia. Maka, faktor-faktor yang menyumbang kepada kejayaan dan penglibatan belia sebagai usahawan tani sebagaimana yang telah dibangunkan oleh Shamsuhaidah dan Madeline Berma (2009) telah berjaya diwujudkan, namun ada sedikit perbezaan dengan dapatan yang diperolehi pengkaji. Dalam kajian yang dilakukan oleh terdapat faktor individu, dan faktor persekitaran yang merangkumi persekitaran domestik dan antarabangsa. Namun, dapatan kajian mendapati hanya faktor individu, dan faktor persekitaran yang meliputi faktor persekitaran dalaman

Pengkaji telah mengenalpasti faktor-faktor yang mempengaruhi penglibatan belia di Pasir Puteh, Kelantan yang terdiri dari faktor individu dan faktor persekitaran. Dari segi faktor penglibatan secara individu, pengkaji telah berjaya mengesan 9 tema asas dan 4 tema utama. Tema asas merupakan tema yang menjadi penyebab kepada faktor-faktor penglibatan belia. Hasil analisa tema asas bagi faktor individu telah membangunkan tema asas yang dikenal pasti berkait rapat dengan penyertaan belia sebagai usahawan tani antaranya untuk menjana pendapatan, sumber pekerjaan, minat, keinginan, pengalaman, pemilikan aset, pengaruh ibu bapa, kemahiran dan kursus. Tema asas juga telah berjaya membangunkan tema utama kajian yang terdiri dari peluang, pembentukan sikap, pengaruh latar belakang responden, dan ilmu pengetahuan yang dimiliki responden. Manakala, dari segi faktor persekitaran pula, tema asas yang terbentuk antaranya jaringan komuniti petani, jaringan agensi, sokongan keluarga, sokongan agensi, dan masyarakat telah menyebabkan terbentuknya tema utama yang terdiri dari jaringan dan sokongan

Dari segi hasil demografi, pengkaji menyimpulkan belia yang bergelar usahawan tani berumur di antara 23 sehingga 40 tahun merupakan responden kajian dan didapati belia berumur 28 hingga 32 tahun lebih ramai penglibatannya sebagai usahawan tani. Penglibatan belia dari segi umur ini menunjukkan belia terdiri daripada golongan belia kelas awal dewasa. Golongan belia dewasa merupakan golongan belia yang rata-ratanya mempunyai kehidupan sendiri,

mempunyai tanggungan, dan telah berkahwin. Belia yang bergelar usahawan tani ini juga terdiri daripada mereka yang menjalankan aktiviti pertanian secara individu dan terlibat secara kontrak melalui pihak tertentu seperti pihak Peladang kawasan. Hal ini menunjukkan penglibatan mereka tidak bergantung kepada peranan pihak tertentu sahaja, tetapi ia bergantung kepada diri mereka sendiri yang berkeupayaan dan memiliki kesungguhan yang tinggi dan sanggup menanggung risiko pertanian.

Hasil kajian mendapati penglibatan belia sebagai usahawan tani dikaitkan dengan peluang yang ditawarkan oleh bidang pertanian melalui peluang menjana pendapatan dan sumber pekerjaan. Antara punca yang dikenalpasti belia terlibat sebagai usahawan tani adalah akibat peluang pekerjaan di pasaran luar yang terhad. Belia yang ditemui rata-ratanya memiliki pendidikan yang tinggi namun akibat persaingan yang tinggi di pasaran pekerjaan menyebabkan mereka tidak mendapat posisi pekerjaan yang baik. Mereka juga menyedari bahawa bidang pertanian ini mampu memberikan pendapatan yang lumayan sama seperti kerja-kerja lain. Hal ini telah mempengaruhi penglibatan mereka untuk bergelar usahawan tani.

Seterusnya, pengkaji mendapati penglibatan belia juga disebabkan sikap yang terbentuk dalam diri individu sehingga timbul minat yang mendalam dalam sektor pertanian dan memiliki keinginan yang tinggi. Minat yang terbentuk didapati datang dari hobi yang menganggap aktiviti pertanian mampu memberi keselesaan kepada mereka. Minat terhadap pertanian ini juga ditanam dalam diri individu melalui mendengar dan melihat kejayaan para usahawan tani lain yang telah berjaya dalam pekerjaan yang diusahakan. Hal ini juga dapat menunjukkan kesungguhan dan kesanggupan mereka untuk berkorban. Malahan juga, minat yang tinggi dalam pertanian menyebabkan seorang individu sanggup menghadapi risiko kerugian dan tidak berputus asa dalam mengerjakan tanaman mereka. Selain itu juga, keinginan bekerja sendiri dan tidak malu dengan pekerjaan yang dilakukan turut mendorong penglibatan belia sebagai usahawan tani. Kesanggupan melakukan kerja secara sendirian tanpa dikawal dan diarah menunjukkan potensi yang dimiliki oleh belia untuk memimpin dan mengurus. Faktor demikian telah menyebabkan petani merupakan seorang yang berwawasan dan cekal dalam mencari rezeki. Hal ini kerana petani terpaksa menanggung risiko kerugian apabila tanaman yang dikerjakan tidak memberikan hasil yang setimpal akibat serangan penyakit, dan kejadian bencana alam seperti kemarau dan banjir yang berpanjangan dan mereka terpaksa menanggungnya secara individu.

Selain itu, faktor yang mempengaruhi penglibatan belia bergelar usahawan tani disebabkan oleh pengaruh latar belakang individu. Latar belakang dipengaruhi oleh pengalaman yang dimiliki, ibu bapa, dan pemilikan aset. Pengalaman yang dimiliki merujuk kepada pengalaman bekerja sebagai petani sama ada dengan membantu keluarga atau mengambil upah. Pengaruh ibu bapa pula merujuk kepada ibu bapa responden yang telah bekerja sebagai petani dan belia tersebut telah mewarisinya. Manakala pemilikan aset pula merujuk kepada belia yang memiliki tanah untuk menjalankan aktiviti pertanian. Oleh hal yang demikian mendapati belia yang terlibat sebagai usahawan dipengaruhi oleh latar belakang.

Belia yang bergelar usahawan dipengaruhi oleh ilmu pengetahuan yang dimiliki iaitu kemahiran dan kursus. Peranan ilmu pengetahuan terhadap bidang pertanian sangat penting kerana melalui ilmu yang dimiliki individu dapat membantu mereka untuk menguruskan tanaman mereka dengan lebih baik melalui penggunaan teknologi dan teknik-teknik tanaman. Namun sebenarnya ilmu pengetahuan tidak bersandar kepada memiliki kemahiran dan menghadiri kursus sahaja, tetapi melalui perkongsian pengetahuan sesama komuniti petani turut membantu individu menambahkan ilmu pengetahuan.

Penglibatan belia juga dipengaruhi faktor persekitaran yang terbentuk. Antara faktor persekitaran yang dikenal pasti memberi pengaruh kepada penglibatan belia adalah wujudnya jaringan di antara komuniti petani dan agensi. Melalui jaringan ini telah berjaya menarik minat dan mempengaruhi belia untuk menyertai bidang pertanian. Melalui jaringan juga, belia dapat berhubung dan berkongsi matlamat yang sama di antara mereka. Kejayaan para petani lain turut mendorong belia menyertainya apabila melihat kejayaan para petani yang memperoleh hasil yang lumayan. Jaringan antara pihak agensi seperti Peladang, MARDI, Yayasan Sejahtera dan Jabatan Pertanian juga turut mempengaruhi penglibatan mereka melalui khidmat nasihat, pemantauan, dan perkongsian maklumat. Selain itu juga, sokongan mampu mempengaruhi belia untuk bergelar usahawan tani. Sokongan sama ada dari segi moral ataupun fizikal telah berjaya menjadikan belia sebagai usahawan tani. Sokongan terdiri daripada kaum keluarga, kerajaan, dan masyarakat. Melalui sokongan dapat menimbulkan keyakinan dan kepercayaan individu terhadap bidang pertanian dan sekali gus membuka langkah untuk menyertainya.

5. Rumusan dan cadangan

Secara keseluruhannya, faktor-faktor yang mempengaruhi penglibatan belia sebagai usahawan tani terdiri dari faktor individu dan faktor persekitaran. Faktor-faktor tersebut dilihat melalui peluang, sikap, latar belakang, ilmu pengetahuan, jaringan dan sokongan. Manakala amalan pengurusan perniagaan pula merupakan cara yang digunakan oleh usahawan tani untuk menguruskan pertanian yang dijalankan. Amalan pengurusan perniagaan yang diamalkan oleh belia dalam kajian ini adalah pemasaran, pengurusan sumber manusia, pengurusan kewangan, perancangan dan pengurusan kualiti. Hal yang demikian bertujuan untuk menyokong penglibatan belia sebagai usahawan yang berjaya menguruskan tanaman mereka. Oleh itu secara keseluruhannya, faktor yang mempengaruhi penglibatan belia sebagai usahawan tani penting untuk dikaji. Penglibatan belia tidak dipengaruhi oleh jenis tanaman yang dijalankan oleh individu sama ada secara tanaman individu atau melalui projek tanaman yang dikendalikan oleh pihak Peladang atau Yayasan Sejahtera.

Rujukan

- Abdul Aziz Yusof & Zakaria Yusof. 2004. *Prinsip Keusahawanan*. Petaling Jaya, Selangor: Prentice Hall, Pearson Malaysia Sdn. Bhd
- Abdul Aziz Abdullah Dan Norhlilmatus Naem Sulaiman, 2013. Factor That Influence The Interest Of Youth In Agricultural Entrepreneurship. *International Journal Of Business And Social Science*. Wwww.Ijbssnet.Com [3 Mac 2014]
- Ab Aziz Yusof. 2010. *Pengenalan kepada Usahawan dan Keusahawanan*. Kuala Lumpur: Penerbit Dewan Pustaka Dan Bahasa.
- Azizah Razak. 2010. *Profil Pandangan Lepas Siswazah Menceburi Bidang Keusahawanan Pertanian*. Tesis Ijazah Sarjana Pendidikan Universiti Teknologi Malaysia.
- Bahagian Pembangunan Kurikulum. 2010. *Buku Panduan Elemen Keusahawanan*. . Putrajaya: Penerbit Kementerian Pelajaran Malaysia.
- Bidang Keberhasilan Utama Ekonomi. <http://www.dvs.gov.my>. [2 Oktober 2013].

- Faridah Shahadan dan Zuraidah Abdullah. 2009. Status dan Penentu Sifat Keusahawanan PKS Asas Tani. *Prosiding Perkem IV*, Jilid 2 (2009) 161-170, ISSN:2231-962X. <http://www.ukm.my/fep/perkem/pdf> [2 Mac 2014].
- Hayrol Azril Mohamed Shaffril, Jeffrey Lawrence D'Silva, JegakUli dan Bahaman Abu Samah. 2010. Socio-Demographic factor that impinge youth acceptance towards agriculture: The case of contract farming in Malaysia. *American-Eurasian Journal Agriculture and Environment Science*, 7(2):242-246, 2010. www.pertanika.upm.edu.my [2 Mac 2014]/
- Jeffrey Lawrence D'Silva, Azmarina Azman, Bahaman Abu samah dan Hayrol Azril Mohamed Shaffril. 2013. Factor Influencing Acceptance Of Contract Farming Among Youth. *Pertanika Journal Science and Humanities*. www.pertanika.upm.edu.my [2 April 2013] .
- Jegak Uli., Jeffrey Lawrence D'Silva, Hayrol Azril Mohamed Shaffril dan Bahaman Abu Samah. 2010. The attitude, belief, support and knowledge level of the youth and their acceptance towards agriculture contract farming. *Journal of social science* 6(3); 350-355. www.pertanika.upm.edu.my [2 April 2013]
- Kementerian Belia dan Sukan. 2006. Akta Pembangunan Belia.
- Kementerian Pertanian dan Industri Asas Tani Malaysia, (2013). <http://www.moa.gov.my> [2 Oktober 2013] .
- Kumar, P. (2007). Resources provision, productivity and contract farming: A case study of Punjab. *Proceeding of the ICAR-NCAP and USAID*. May 5-6, New Delhi, India. <http://www.ncap.res.in> [22/4/2014]
- Mohd Noor Mohd Shariff & Samsuri Samsudin. 2008. Keusahawanan Peladang di Lembaga Kemajuan Pertanian Muda (MADA): Kajian dari Sudut Pendekatan Sikap. Sintok: Universiti Utara Malaysia. *IJMS* 15(1), 161-180 (2008). www.uum.edu.my
- Mohd Hashim Bin Abdullah. 2012.. Sempena Program Seminar Government To Youth (G2y) Sambutan Hari Belia Negara 2012, Himpunan Jutaan Belia.
- Norsida Man. 2008. Persepsi Belia Tani Terhadap Pertanian dan Keperluan Pendidikan Pertanian. *Jurnal Pembangunan Belia Malaysia*. Bil.1 ISSN 1985-9422. Disember 2008. Putrajaya: Institut Penyelidikan Pembangunan Belia Malaysia.
- Norashidah Hashim, Norasmah Othman, & Noraishah Buang. 2009. Konsep Kesyediaan Keusahawanan Berdasarkan Kajian Kes Usahawan Industri Kecil Dan Sederhana Di Malaysia. *Jurnal Pendidikan Malaysia* 34(1)(2009):187-203
- Norhasni Zainal Abiddin. 2008. Fungsi dan Sumber Mentor Tidak Formal Usahawan Belia Tani Siswazah. *Jurnal Pembangunan Belia Malaysia*. Bil.1 ISSN 1985-9422. Disember 2008. Putrajaya: Institut Penyelidikan Pembangunan Belia Malaysia.
- Norhasnibinti Zainal Abidin. 2011. *Belia Usahawan Tani Siswazah: Isu dan Cabaran*. Kertas Penyelidikan. Putrajaya: Institut Penyelidikan Belia Malaysia. [22/4/2014]
- Nurulhuda Che Abdullah & Ramlee Mustapha. 2009. Kajian Kes Usahawan Tani Industri Kecil Sederhana (Iks) Bumiputera Di Negeri Terengganu. *Jurnal Pendidikan Malaysia* 34(2)(2009): 149-165.
- Othman Lebar. 2009. *Penyelidikan Kualitatif: Pengenalan kepada Teori dan Metod*. Tanjung Malim: Universiti Perguruan Sultan Idris (UPSI).
- Prowse M & Chimhowu A. 2007. *Making Agriculture Work For The Poor*. Natural Resources Perspective. Overseas Development Institute. <http://www.odi.org.uk/sites/odi.org.uk>. [2 Oktober 2013].
- Rancangan Malaysia Ke Sepuluh. <http://www.pmo.gov.my> [2 Oktober 2013].

-
- Rosli Mahmood, Azrain Nasyrah Mustapa, Rosmi Mohd Saad, Mohamad Yusop Mohd Jani, Norria Zakaria, Syahrina Abdullah, Ahmad Khairi Yahya, Hoe Chee Hee, Shamsul Huda Abd.Rani, Muhammad Shukri Bakar, Shuza Sa'atar, Lily Julienti Abu Bakar & Habshah Bakar. 2010. *Prinsip-prinsip keusahawanan*. Ed. ke-2. Singapura: Penerbit Cengage Learning Asia Pte Ltd.
- Sarmila Md Sum. 2013. *Pembangunan Komuniti Melalui Inisiatif Tanggungjawab Sosial Korporat (CSR): Kajian Pengalaman Peserta Projek Perladangan Cili Kontrak di Bukit Awang, Pasir Puteh Kelantan*. Tesis Dr. Fal, Program. Sains Pembangunan, Pusat Pengajian Sosial, Persekitaran dan Pembangunan, Universiti Kebangsaan Malaysia.
- Sarmila M.S, Zaimah.R, Azima A.M, Suhana S. S Selvadurai, Er Ah Choy. 2013. *Sumbangan Tanggungjawab Sosial Korporat (CSR) dalam Melahirkan Usahawan Tani: Satu Kajian Kes*. Prosiding yang tidak diterbitkan. Bangi: Universiti Kebangsaan Malaysia.
- Yep putih. 1985. *Keusahawanan*. Kuala Lumpur: Penerbit Dewan Bahasa dan Pustaka.
- Zafir Mohd Makhbul & Fazilah Mohamad Hasun. 2003. *Menjadi Usahawan: Panduan Menubuhkan Dan Menguruskan Perusahaan Secara Profesional*. Kuala Lumpur: Penerbit Perpustakaan Negara Malaysia.
- Zainal Abidin Hashim. 2009. *Sikap Dan Tingkah Laku Strategik Usahawan Berjaya*. Dlm. Yahaya Ibrahim, Mohd Fauzi Mohd Jani, Sarmila Md Sum, Zaimah Ramli (penyunting). *Keusahawanan dan Cabaran Perniagaan di Malaysia*. Bangi: Penerbit Fakulti Ekonomi dan Perniagaan, Universiti Kebangsaan Malaysia.